



THUSO E TSOANG HOLIMO

E BOKELLETSOE KE
WATSON GOODMAN

MPHO FEELA – HA E REKISOE

THUSO E TSOANG HOLIMO

Lentsoe la Molimo “le tsoa holimo” e le ka nete le na le thuso lipelong tse lapetseng le tse nyoretsoeng ho loka. Ha motho a baka sebeng, a tlohela sebe, a lumele ho ‘Moloki Morena Jesu Krete, ka pelo ea hae eohle, Morena o tla iponahatsa ho ena a mo nehe thabo le khotso ea Hae, hammoho le bophelo pelong ea molumeli. Ho na ke ho tsebile ka selemo sa 1937, ha esale ho tloha nakong eo ho felile lilemo tse 25, ‘me se tsoalle se na sa ka le Morena Jesu sentse se le joalo. Kea ho rapela hle, hore o inebele ho ena joale, haeba ha o so etse joalo.

— Watson Goodman

LERATO LA MOLIMO

1

Johanne 3:16

Hobane Modimo o ratile lefatshe hakalo, o bile wa le nea Mora wa oona ya tswetsweng a nnotshi; hore e mong le e mong ya dumelang ho yena, a se ke a timela, a mpe a be le bophelo bo sa feleng.

Baroma 5:8

Empa moo Modimo o totisitseng lerato la oona ho rona teng, ke ka hore, re sa le baetsadibe, Krete o bile a shwa sebakeng sa rona.

Johanne 15:13

Ha ho motho ya nang le lerato le fetang la ya tellang metswalle ya hae bophelo ba hae.

Johanne 13:1

Mokete wa Paseka ha o se o tla etswa, Jesu, ka ho tseba hobane nako ya hae e tlile ya ho tloha lefatsheng, ho ya ho Ntatae, jwaleka ha a ne a ratile ba hae ba lefatsheng, a ba rata le ho isa qetellong.

Tshenolo 1:5

Le ke Jesu Krete, paki e tshepehang, letsibolo la tsoho ya bafu, le Morena wa marena a lefatshe!

Jeremia 31:3

Jehova o iponahaditse ho nna a le hole, a re: E, ke o rata ka lerato le sa feleng; ka baka leo ke tla o bolokela mohau wa ka.

BO MOLIMO BA JESU KRESTE

Mattheu 1:22, 23

Hoo hohle ho hlhile, hore ho etsahale o boletsweng ke Morena, ka moprofeta ya itseng: Bonang, morwetsana o tla emola, a tswale mora, mme lebitso la hae o tla bitswa Emmanuele, ke hore, ha ho fetolwa, Modimo o na le rona.

Johanne 14:9, 10a

Jesu a re ho yena: Ke dutse le lona nako e kalo, mme ha o a ka wa ntseba, Filippi, na? Ya mpone ng o bone Ntate, mme o ka rialo jwang, ha o re: Re bontshe Ntate? Na ha o dumele hobane ke ho Ntate, le hobane Ntate o honna?

Johanne 1:1, 14

Lentswe le ne le le tshimolohong, mme Lentswe le ne le le ho Modimo, mme Lentswe e ne e le Modimo. . . Lentswe le ne le etswe nama, mme la aha hara rona le tletse mohau le nnete, mme re bohile kganya ya lona, e kang kganya ya Mora a nnotshi ya tswang ho Ntate.

I Timothea 3:16

Mme ruri sephiri sa borapedi se seholo: o bonahetse nameng, o lokiseditswe ke Moya, o bonwe ke mangeloi, o boletswa hara ditjhaba, o dumetswe lefatsheng, o phahamiseditswe kganyeng.

JESU MORA OA MOLIMO

3

I Johanne 4:15

E mong le e mong ya bolelang hore Jesu ke Mora wa Modimo, Modimo o dutse ho yena, mme le yena o dutse ho Modimo.

Luka 1:35

Lengelo la fetola, la re ho yena: Moya o Halalelang o tla thehela hodima hao, mme matla a Ya hodimodimo a tla o kgurumetsa; ka baka leo, ho halalelang ho tla tswalwa ke wena ho tla bitswa Mora Modimo.

Mattheu 3:17

Mme ha utlwahala lentswe le tswang mahodimong, le re: Enwa ke Mora wa ka ya ratwang, eo ke kgahliswang ke yena.

Bakolosse 2:9

Hobane botlalo kaofela ba bomodimo bo ahile ho yena ka mmele.

Esaiia 9:6

Hobane re tswaletswe ngwana, re neilwe mora; borena bo beilwe lehetleng la hae, mme o tla bitswa Moeletsi ya makatsang, Modimo o matla, Rabosafeleng, Morena wa kgotso.

Mattheu 17:5

A re a sa bua, leru le kganyang la hlaha, la ba kgurumetsa, mme ha utlwahala lentswe le tswang lerung, le re: Enwa ke Mora wa ka ya ratwang, eo ke kgahliswang ke yena; mo utlweng!

JESU O BOLELA HORE ENA KE MANG

Johanne 13:13

Le mpitsa Moruti le Morena, mme le bolela hantle, hobane ke yena.

Johanne 8:23

A mpa a re ho bona: Lona, le ba tlase, nna, ke wa hodimo; lona, le ba lefatshe lena, nna, ha ke wa lefatshe lena.

Johanne 8:58

Jesu a re ho bona: Ka nnetenete ke re ho lona: Abrahamama ha a eso ho hlahe, ke ntse ke le teng.

Johanne 11:25

Jesu a re ho yena: Ke nna tsoho le bophelo: ya dumelang ho nna, leha a shwele, o tla phela.

Johanne 10:7

Jesu a boela a re ho bona: Ka nnetenete ke re ho lona: Ke nna monyako wa dinku.

Johanne 4:25, 26

Mosadi a re ho yena: Ke a tseba hobane Messia, ya bitswang Krete, o tla tla; mohla eo a tli leng, o tla re tsebisa tsohle. Jesu a re ho yena: Ke nna, ya buang le wena.

Johanne 6:35

Jesu a re ho bona: Ke nna bohobe ba bophelo; ya tlang ho nna a ke ke a lapa, mme ya dumelang ho nna a ke ke a nyorwa le ka mohla o le mong.

LI MAKATSO TSE LING TSE ENTSOENG KE JESU 5

Mattheu 20:30, 34

Batho ba babedi ba fofetseng, ba dutseng pela tsela, ha ba utlwa hoba Jesu o a feta, ba hoa, ba re: Morena, mora Davida, re utlwele bohloko! . . . Jesu a ba utlwela bohloko, a ama mahlo a bona, mme hang mahlo a bona a boela a bona; mme ba mo latela.

Mattheu 14:19-21

Eitse hobane a laele bongata ho dula hodima jwang, a nka mahobe a mahlano le dihlapu tse pedi, a lelala hodimo, a boka; a ntoo ngwatha mahobe, a a nea barutuwa ba hae, mme barutuwa ba a abela bongata. Mme ba eja

bohle, ba kgora, ha ba ha thonakwa dingwathwana tse setseng, tsa tlatsa diroto tse leshome le metso e mmedi. Mme ba jeleng e be e le banna ba batlileng ho ba dikete tse hlano, basadi le bana ba sa balwe.

Mattheu 21:19

A bona sefate sa feiga se pela tsela, a ya ho sona, empa a se ke a fumana letho ho sona, ha e se mahlaku feela; a re ho sona: Ho se ke ha ba ha hlaha tholwana ho wena le ke ho sa feleng. Yaba sefate sa feiga se omella hang hang.

JESU KRESTE KE 'MOPI LE MORENA

Baheberu 1:2

Modimo. . . jwale, mehleng ena ya qetello o buile le rona ka Mora, eo o mmeileng mojalefa wa ntho tsohle, eo hape o entseng ka yena tse bopilweng kaofela.

Diketso 2:36

Ka baka leo, ntlo yohle ya Israele e ke e tsebe ka nnete, hobane Jesu eo le mo thakgisitseng, Modimo o mo entse Morena le Kreste.

Bakolosse 1:16

Hobane ka ho yena ho hlodilwe tsohle tse mahodimong le tse lefatsheng, tse bonwang le tse sa bonweng, leha e le diterone, leha e le marena, leha e le dibloho,

leha e le mebuso; tsohle di hlo-dilwe ka yena, mme di hloletswe yena.

I Bakorinthe 1:9

Modimo, o le bileditseng kopanong le Mora wa oona Jesu Kreste, Morena wa rona, o hlile o a tshepeha.

Baroma 14:9

Hobane ha Kreste a shwele, a ba a tsoha, a boela a phela, ke ho re, e be yena ya busang bafu le ba phelang.

Johanne 1:3

Dintho tsohle di entswe ke lona, mme hara dintho tse leng teng, ha ho letho le entsweng kante ho lona.

JESU KRESTE KE MOAHLOLI OA BOHLE

7

Baroma 14:10

Empa wena, o ahlolelang ngwaneno? kapa wena, o nyedisetsang ngwaneno? Athe bohle re tla emiswa pela setulo sa kahlolo sa Modimo.

Diketso 10:42

O re laetse ho bolella setjhaba, le ho paka hore ke yena ya beilweng ke Modimo ho ahlola ba phelang le ba shweleng.

Mattheu 25:32

Ditjhaba tsohle di tla boke-llwa pela hae; mme o tla kgetha ba bang ho ba bang, jwaleka modisa ha a kgetha dinku ho dipodi.

Baroma 2:16

Tsatsing leo Modimo o tla ahlola di-satsejweng tsa batho ka Jesu Kreste, jwaleka ha Evangedi ya ka e ruta.

II Timothea 4:1

Ke o laela ke hona haholo pela Modimo, le pela Morena Jesu Kreste, ya tlang ho ahlola ba phelang le ba shweleng mohla a blahang ka mmuso wa hae, ke re.

Luka 3:17

Seoloso sa hae se letsohong la hae, mme seotlo sa hae o tla sefiela ruri; o tla bokella koro modikong wa hae; ha e le mooko, o tla o tjhesa mollong o sa timeng.

Johanne 10:9

Ke nna monyako; ekare ha motho a kena ka nna, o tla bolokeha; o tla nne a kene a nne a tswe, a bone makgulo.

Johanne 14:6

Jesu a re ho yena: Ke nna tselala, le nnete, le bophelo; ha ho motho ya ka tlang ho Ntate, ha e se ka nna.

Baroma 3:24

Ba mpa ba bewa ba lokileng ke mohau wa oona feela, ka topollo e leng ho Jesu Kreste.

Baheberu 5:9

Mme jwale, ha a phethehile, o entswe moetsi wa poloko e sa feleng ho bohle ba mo utlwang.

Diketso 4:12

Mme ha ho poloko ho e mong; hobane ha ho lebitso le leng tlasa lehodimo, leo batho ba le neilweng, leo re ka bolokehang ka lona.

Baheberu 7:25

Ke ka baka leo a ka tsebang ho pholosa ka ho fetisisa ba atamelang Modimo ka yena, ka hobane o ntse a phela ka mehla ho ba rapella.

Johanne 8:24

Ke ka baka leo ke le boleletseng, ka re: Le tla shwa dibeng tsa lona. Ekare ha le sa dumele hobane ke nna enwa, le tla shwa dibeng tsa lona.

TOPOLLO FEELA KA ENA KRESTE

9

Tite 2:14

Ya iteleletseng rona, a tle a re lopolle bokgopong bohle, mme a re hlatswe, a tle a iketsetse ka rona setjhaba seo e leng sa hae ka sebele, se tjhesehelang mesebetsi e metle.

I Bakorinthe 1:30

Mme ke ka oona le leng ho Jesu Kreste, ya entsweng ke Modimo bohlale ba rona, le ho loka ha rona, le kgalalelo ya rona, le topollo ya rona.

Bakolosse 1:12-14

Le ntse le leboha Ntate ya re entseng ba loketsweng ke ho ba le kabelo lefeng la bahalaledi lese-

ding; mme o re ntshitse matleng a lefifi, wa re falletsa mmusong wa Mora wa oona ya ratwang; eo re nang le topollo ka madi a hae, e leng tshwarelo ya dibe.

Tshenolo 5:9

Ba bina sefela se setjha, ba re: O loketse ho nka buka le ho manolla ditiiso tsa yona: hobane o ne o hlajwe, mme wa lopollela Modimo, ka madi a hao, batho ba mefuta yohle, le ba dipuo tsohle, le ba merabe yohle, le ba ditjhaba tsohle.

Luka 19:10

Hobane Mora motho o tlike ho batla le ho pholosa ho timetseng.

PHEKO MALING A KRESTE

Baefese 1:7

Ke ka ho yena re nang le topollo ka madi a hae, ke ho re, tshwarelo ya ditshito, ka monono wa mohau wa hae.

I Johanne 1:7

Empa ha re tsamaya leseding, jwaleka ha oona o le leseding, re na le kopano hammoho, mme madi a Jesu Kreste, Mora wa oona, a re hlatswa dibe tsohle.

I Petrose 1:18, 19

Le ntse le tseba hobane, hase ka tse bolang, hase ka silevera le ka gauta le lopolotsweng mokgweng wa lona wa lefeela, oo le neng le o rutilwe ke bo-ntata lo-

na; empa e le ka madi a bohlokoa a Kreste, konyana e se nang letheba le sekodi.

Baheberu 9:14

Ana ha e le madi a Kreste, ya itlhabisitseng ho Modimo ka Moya wa ka mehla yohle, e le pheko e se nang letheba, madi ao a tla hlatswa matswalo a lona hakang mesebetsing e shweleng, hore le tle le sebeletse Modimo o phelang!

Baroma 5:9

Mme jwale, ha re se re beilwe ba lokileng ka madi a hae, re tla lwelwa bohalleng ho fetisa hakang ka baka la hae.

Baroma 5:1

Jwale, ha re beilwe ba lokileng ka tumelo, re na le kgotso ho Modimo, ka Jesu Kreste, Morena wa rona.

Bagalata 5:6

Hobane ho Jesu Kreste, ho bo-lla le boqai ha di thuse letho, empa ho thusa tumelo e sebetsang ka lerato.

Baefese 2:8, 9

Hobane le bolokehile ke mohau, ka tumelo; ha ho tswe ho lona, ke mpho ya Modimo; hase ka mesebetsi, ho tle ho se ke ha eba motho ya ithorisang.

Johanne 20:31

Empa eo e ngodilwe hore le tle le dumele hobane Jesu ke Kreste, Mora wa Modimo, le hore, ka ho dumela, le be le bophelelo ka lebitso la hae.

I Johanne 5:4

Hobane hohle ho tswetsweng ke Modimo ho hlola lefatshe, mme hlolo e hlotseng lefatshe ke tumelo ya rona.

Johanne 6:28, 29

Ba re ho yena: Re tla etsang hore re sebetse mesebetsi ya Modimo na? Jesu a ba araba, a re: Mosebetsi wa Modimo ke hoba le dumele ho eo o mo romileng.

Dipesaleme 103:11

Empa jwaleka lehodimo ha le phahamile hodimo ho lefatshe, mohau wa hae o moholo jwalo ho ba mo tshabang.

Mikea 7:18

Modimo ke ofe o jwaleka wena, o tlosang bokgopo, o tshwarelang dibe tsa masala a lefa la hao? O ke ke wa boloka bohale ba oona ka ho sa yeng kae, hobane ha e le oona, o kgahlwa ke ho hauhela.

Dipesaleme 108:4

Hobane mohau wa hao o phahame hodimo ho mahodimo mme nnete ya hao e fihla marung.

Dillo tsa Jeremia 3:22, 23

Ke mehauhelo ya Jehova e entseng hore re se ke ra timela, hobane mohau wa hae ha o fele; e nne e be teng ka hosasa ho hong le ho hong. Botshepehi ba hae bo boholo.

Dipesaleme 103:17

Empa mohau wa Jehova o hlo-la o le teng ka mehla le mehla ho ba mo tshabang, le ho loka ha hae ho bana ba bona.

Tite 3:5

E seng ka mesebetsi e lokileng e entsweng ke rona, empa e bile ka lereko la oona, ka hlatsuo ya ho tswalwa la bobedi, le ka ntjha-fatso ya Moya o Halalelang.

Mattheu 11:28

Tlong ho nna, lona bohle ba kgathetseng, ba imelwang, mme ke tla le imolla!

Esaia 1:18

Mme le tle, re lokise ditaba, ho bolela Jehova. Leha dibe tsa lona di ka ba kgubedu jwaleka krimstone, di tla sweufala jwaleka lehlwa; leha di ka ba kgubedu jwaleka sekarelata, di tla ba tshweu jwaleka boya ba nku.

Genese 7:1

Jehova a re ho Noe: Kena arekeng, wena le ba ntlo ya hao kaofela, hobane ke o bone o lokile pela ka lelokong lena.

Tshenolo 22:17

Moya le monyaduwa ba re: Tlo! Le ya utlwang a ke a re: Tlo! Le ya nyorilweng a a tle; le ya ratang, a nke feela metsi a bophelo.

Johanne 7:37

Ka letsatsi la ho qetella mokele, e leng le leholo, Jesu a ema, a hoa, a re: Ekare ha e mong a nyorilwe, a tle ho nna, a nwe.

Esaia 55:1

Helang! lona kaofela ba nyorilweng, tlong metsing; le lona bao le se nang tjhelete, tlong, ithekeleng, mme le je. Tlong, le ithekele veine le lebese, le se na tjhelete, le se na ho reka.

14 HASE BATHO BOHLE BA ELENG BANA BA MOLIMO

II Bakorinthe 6:17, 18

Ka baka leo, tswang hara bona, mme le ikgethe, o rialo Morena; le se ke la ama sesila; mme nna ke tla le amohela, mme ke tla ba ntata lona, lona le be bara ba ka le baradi ba ka, ho thualo ke Morena ya matla ohle.

Bafilippi 2:15

Le tle le hloke sekodi le letheba, le be bana ba Modimo, ba sa nyatseheng hara moloko o senyehileng, o kgopo, oo le kganyang hara oona jwaleka masedi lefatsheng, le ntse le phahamisitse lentswe la bophelo.

Baroma 8:14, 15

Hobane bohle ba tsamaiswang ke Moya wa Modimo, bona ke bana ba Modimo. Hobane ha le a ka la newa moya wa bohlanga, hore tshabo e boele e be teng, le mpa le neilwe Moya wa ba bewang bana, oo re bitsang Abba! Ntate! ka oona.

I Johanne 3:10

Ke hona moo ho bonahalang bao e leng bana ba Modimo le bao e leng bana ba Diabolose: E mong le e mong ya sa etseng ho lokileng hase wa Modimo, leha e le ya sa rateng ngwanabo.

Diproverbia 23:31, 32

O se ke wa tadima veine ha e le kgubedu, ha e phophoma le-fiswaneng, leha e theohela mme-tsong hamonate. Ho felleng, e loma jwaleka noha, e hlaba jwa-leka marabe.

Esaiia 5:11

Ho madimabe ba tsohelang ho titimela jwaleng, ba sa bo tlohe-leng ho isa ka phirima, ho fihlela ba tahwa.

Bagalata 5:19-21

Mme mesebetsi ya nama e pe-peneneng: Ke ho feba, le ho boka, ke bonyala, le bootswa; ke ho ra-pela medimo ya bohata, le boloi, ke hloyano, le dikomang, ke mo-

na, le bohale, le dikgang, le di-phapang, le dikgaohano; ke mo-hono, le dipolao, le botahwa, le meharo, le dintho tse jwalo, tseo ke le bolellang, jwaleka ha ke se nkile ka le bolella, hore ba etsang tse jwalo, ba ke ke ba ba ba rua mmuso wa Modimo.

Baroma 13:13, 14

Re tsamayeng ka mokgwa o tshwanelang, jwaleka batho ba tsamayang motshehare o moholo, e seng ka meharo, le botahwa, le bootswa, le dikgang, le mona. Le mpe le ikapese ka Morena Jesu Krete, mme le se ke la baballa nama ho e kgorisa ditakatsong tsa yona.

Mattheu 22:37, 38

Jesu a re ho yena: Ke e reng: Rata Morena, Modimo wa hao, ka pelo ya hao yohle, le ka moya wa hao oohle, le ka kgopolo ya hao yohle. Molao oo ke o moholo wa pele.

Mareka 10:17-22

. . . a mmotsa, a re: Moruti ya molemo, ke tla etsang ke tle ke rue lefa la bophelo bo sa feleng? Jesu a re ho yena: . . . O tseba melao e reng: O se ke wa feba, o se ke wa bolaya, o se ke wa utswa, o se ke wa bea bopaki ba bohata, o se ke wa ja tsa e mong, hlonepha ntatao le mmao.

Eo a araba, a re ho yena: Moruti, tseo tsohle ke di bolokile ha e sa le le bonyenyaneng ba ka. Jesu ha a mo shadima, a mo rata, mme a re ho yena: O hloka ntho e le nngwe: Tsamaya, o rekise ka tsohle tseo o nang le tsona, o di fe bafumanehi, mme o tla ba le letlotlo lehodimong; o ntano tla, o ntatele o ipelesitse sefapano. Eo a mpa a hlajwa ke polelo eo, a ikela a swabile: hobane e ne e le ya nang le maruo a maholo.

Diproverbia 16:25

Mohlomong ho motho tsela e nngwe eka e sasametse, athe phello ya yona ke lefu.

Jakobo 1:22

Le be baetsi ba lentswe, e seng bautlwi feela ba ithetsang.

Baefese 5:6

Motho a se ke a le thetsa ka dipolelo tsa lefeela; hobane ke ka baka la ntho tseo bohale ba Modimo bo tlelang bana ba ho se dumele.

I Bakorinthe 6:9, 10

Ana ha le tsebe hoba bakgopo ha ba ka ke ba rua lefa la mmuso wa Modimo na? Le se ke la lahleha: Ha e le ba ditshila, ha e le ba rapelang ditshwantsho, ha e le ba-boki le bafebi, leha e le Basodo-

ma, le mashodu, le ba akatsang leruo, le matahwa, le ba sebang ba bang, le ba utswang, ba jwalo ba ke ke ba rua lefa la mmuso wa Modimo.

I Johanne 3:7, 8a

Bana, le se ke la thetswa ke motho: Ya etsang ho lokileng o lokile, jwaleka ha le yena a lokile; ya etsang sebe ke wa Diabolose; hobane Diabolose o etsa sebe e sa le ho qaleng.

Bagalata 6:3

Hobane ekare ha e mong a itekanya hore ke letho, athe hase eng, o ithetsa e le yena.

SEBE SE TLISA LEFU**Baroma 5:12**

Ka baka leo, jwaleka ha sebe se kene lefatsheng ka motho a le mong, mme lefu le kene ka sebe, ka mokgwa o jwalo lefu le aparetse batho bohle, ka hobane ba sitilwe bohle.

Jakobo 1:15

Mme takatso hoba e emare, e tswala sebe; mme sebe ha se phe-thehile, se tswala lefu.

Esekiele 18:20

Moya o etsang sebe, ke oona o tla shwa. Mora motho eo a ke ke a jara letho la molato wa bokgopo ba ntatae, mme motho a ke ke a jara letho la molato wa bokgopo

ba mora wa hae; ho loka ha ya lokileng ho tla ba hodima hae, bokgopo ba e mobe bo be hodima hae le bona.

Baroma 8:6

Hobane thato ya nama ke lefu, empa thato ya moya ke bophelo le kgotso.

Diproverbia 11:19

Ho loka ha sebele ho isa bophelong; ha e le ya latelang bobbe, yena o titimela lefung.

Luka 15:32

Empa re ne re tshwanetse ho nyakalla le ho thaba, hobane enwa, ngwaneno, o na be a lablehile, mme o bile o fumanwe.

KRESTE O HLOTSE LEFU

19

Johanne 11:43, 44

Eitse hobane a bolele tseo, a hoa ka lentswe le leholo, a re: Lasaro, tswa moo! Yaba mofu o tswa a thatilwe matsoho le maoto ka masela, a kgurumeditse sefahleho ka duku. Jesu a re ho bona: Mo lokolleng, le mo lesele a itsamaele.

Tshenolo 1:18

Ke na be ke shwele, mme bona! ke phela ka mehla le mehla. Amen! Ke na le dinotlolo tsa nqalo ya bafu le tsa lefu.

Johanne 10:17, 18

Seo ke ratwang ke Ntate ka baka la sona ke hobane ke bea bophelo ba ka, ke tle ke boele ke

bo nke. Ha ho motho ya nkamohang bona; ke nna ke bo beang ka ho rata ha ka; ke na le matla a ho bo bea, le matla a ho boela ke bo nka. Taelo eo ke e nkile ho Ntate.

Luka 7:14, 15a

Mme a atamela, a ama mojaro wa mofu. Yaba ba mo jereng ba ema. A re: Mohlankana, ke re ho wena: Tsoha! Yaba mofu o a dula, a qala ho bua. . .

I Bakorinthe 15:25, 26

Hobane e ka kgona a buse, a tle a be a bee dira tsohle ka tlasa maoto a hae. Sera se tlang ho fediswa moraorao ke lefu.

Deuteronomoma 5:7-21

O se ke wa ba le medimo e meng pela sefahleho sa ka.

O se ke wa iketsetsa setshwantsho se betlilweng, leha e le setshwantsho se seng sa tse hodimo mahodimong, leha e le sa tse tlase lefatsheng, leha e le sa tse metsing ka tlase ho lefatshe. O se ke wa di kgumamela, o se ke wa di sebeletsa. . .

O se ke wa tlaela ka lebitso la Jehova, Modimo wa hao; hobane Jehova a ke ke a latola molato wa ya tlaelang ka lebitso hae.

Boloka letsatsi la phomolo ho le kgetha, jwaleka ha Jehova, Modimo wa hao, a o laetse. O tla se-

betsa ka matsatsi a tsheletseng, o etse mosebetsi wa hao oohle; empa letsatsi la bosupa ke phomolo ya Jehova, Modimo wa hao. . .

Hlonepha ntatao le mmao, jwaleka ha Jehova, Modimo wa hao, a o laetse. . .

O se ke wa bolaya.

O se ke wa feba.

O se ke wa utswa.

O se ke wa etselletsa wa heno ka leshano.

U se ke wa lakatsa mosadi wa wa heno; o se ke wa lakatsa ntlo ya wa heno, leha e le tshimo ya hae, leha e le mohlanka wa hae

e motona, kapa e motshehadi,
leha e le kgomo ya hae, leha e le

esele ya hae, leha e le ntho e
nngwe e leng ya wa heno.

O KEKE OA IPATELA MOLIMO

21

Diproverbia 15:3

Mahlo a Jehova a dinqalong
tsohle, a qamaka ba babe le ba
batle.

Luka 8:17

Hobane ha ho letho le sephi-
ring, le sa tlo ka le bonahala,
mme ha ho letho le patilweng, le
sa tlo ka le tsejwa le ho hlhela
pepeneneng.

Jobo 34:21, 22

Hobane mahlo a oona a tadi-
mile mekgwa ya batho bohle,
mme o bona metsamao ya bona
kaofela. Ha ho lefifi, ha ho mo-

riti o motsho, moo ba sebetsang
bokgopo ba ka ipatang teng.

Dipesaleme 139:8, 12

Ha nka nyolohela mahodi-
mong, o teng; leha nka ya robala
nqalong ya bafu, le moo o teng!
. . . Efela ke wena o bopileng le-
theka la ka; o ntohile popelong
ya mmè.

Jeremia 23:24

Na motho a ka ya a pateha se-
phiring, hore ke se ke ka mmona,
ho bolela Jehova? Ha ke re, ma-
hodimo le lefatshe a tletse nna,
ho bolela Jehova?

KOTLO E SAFELENG EA BAO BA SA TSABENG MOLIMO

II Petrose 3:7

Ha e le mahodimo a jwale le lefatshe la jwale, di boloketswe mollo ke lentswe lona leo, di boloketswe letsatsi la kahlolo, le la tshenyeho ya batho ba nyefolang.

Dipesaleme 9:17

Bakgopo ba leba nqalong ya bafu, ho jwalo le ditjhaba kaofela tse lebetseng Modimo.

Mattheu 18:8

Empa letsoho la hao, kapa leoto, ha le o dihela, o le pome, o le lahlele hole le wena; hobane ho molemo ho wena ho kena bophelong leha o le tsohane, kapa o le

sehlotsa, ho ena le ho lahlelwa mollong o sa feleng, o ena le mato a mabedi, kapa matsoho a mabedi.

Mattheu 13:41, 42

Mora motho o tla roma mangeloi a hae; a tla kgetha mmusong wa hae dikgopiso tsohle le ba etsang bokgopo, mme a ba lahlele seboping sa mollo, moo dillo di tla ba teng le ditsikitlano tsa meno.

Mattheu 25:46

Mme bona bao ba tla ya bohlokong bo sa feleng, empa ba lokileng ba tla ya bophelong bo sa feleng.

KAPELE KE KAHLOLO

23

Baheberu 9:27

Mme jwaleka ha ho laetswe hoba batho bohle ba shwe hang, ho ntoo ba kahlolo.

II Bakorinthe 5:10

Hobane e ka kgona re hlahe bohle pela setulo sa kahlolo sa Krete, hore e mong le e mong a tle a nke ho lekanang seo a se entseng ha a sa le mmeleng, leha e le se setle, leha e le se sebe.

II Petrose 2:9

Ke moo ho bonahalang hobane Morena o tseba ho lwela barapedi molekong, le ho boloka bakgopo hlokofatso ya letsatsi la kahlolo.

Diketso 17:31

Hobane o beile letsatsi le leng leo o tla ahlola lefatshe ka lona ka ho loka, ka monna eo o mmee-tseng hoo, o lokiseditse bohle tshepiso ya teng ka ho mo tsosa bafung.

Baroma 14:12

Ka mokgwa o jwalo, motho ka mong ho rona o tla ikarabela ho Modimo bakeng sa tsa hae.

I Johanne 4:17

Moo lerato le phethehang ho rona, re tle re be le tshepo e tiileng ka letsatsi la kahlolo, ke ha seo a leng sona le rona re eba sona lefatsheng lena.

MOHAU OA JESU KRESTE

II Bakorinthe 8:9

Hobane le tseba mohau wa Morena wa rona Jesu Kreste, hobane, leha a ne a enne, o ne a ike-tse mofumanehi ka baka la lona, le tle le ene ka bofumanehi ba hae.

Diketso 4:33

Baapostola ba ne ba paka tsoho ya Morena Jesu Kreste ka matla a maholo, mme hlohonolofatso e kgolo e ne e dula hodima bona bohle.

I Petrose 5:5b

. . . hobane Modimo o hanela ba ikgohomosang, empa o hanelela ba ikokobetsang.

Baroma 5:15

Empa neo ya mohau ha e dule jwaleka tlolo; ka hobane ekare ha ba bangata ba shwele ka tlolo ya motho a le mong, mohau wa Modimo le neo e tswang mo-haung wa motho a le mong, e leng Jesu Kreste, di atetse ba bangata ka ho fetisisa.

Baroma 9:16

Ka baka leo, hase taba ya ya ratang, leha e le ya ya titimang, empa e le ya Modimo o haubelang.

II Bakorinthe 9:15

Ho bokwe Modimo ka neo ya oona e se nang ho bolelwa.

II Bakorinthe 7:10

Hobane ho swaba ka mokgwa o ratwang ke Modimo ho hlahisa pako e pholosang, e sa bake-lweng; empa ho swaba ka mokgwa wa lefatshe ho hlahisa lefu.

Diketso 3:19

Bakang ke hona, mme le soko-lohe, dibe tsa lona di tle di hla-kolwe.

Luka 13:3

Tjhe, ke a le bolella. Empa e-kare ha le sa bake, le tla timela jwalo kaofela.

Esekiele 18:31

Lahlelang hole le lona ditlolo tsohle tsa lona, tseo le tlotseng ka tsona, le iketsetse pelo e ntjha

le moya o motjha. Na le ratelang ho shwa, lona ba ntlo ya Iseraele?

Mattheu 3:2

O ne a re: Bakang, hobane mmuso wa mahodimo o atame-tse.

Diketso 2:38

Petrose a re ho bona: Bakang, mme e mong le e mong wa lona a kolobeletswe ka lebitso la Jesu Krete tshwarelong ya dibe, mme le tla nka neo ya Moya o Halale-lang.

Diketso 17:30

Modimo ha o se, o lesitse di-tshiu tseo tsa ho se tsebe hore di fete, jwale, o bolella batho bohle, naheng tsohle, hore ba bake.

TSOARELLO EA LIBE**Esaiia 55:7**

Molotsana a furalle tsela ya hae, ya kgopo a tlohele mehopolo ya hae, a sokolohela ho Jehova, mme o tla mo hauhela; a sokolohela ho Modimo wa rona, hobane o tshwarela haholo.

Esekiele 18:21

Ha e le e mobe, ha a ka sokoloha dibeng tsohle tseo a neng a di etsa, a boloka dikomelo tsohle tsa ka, a etsa ka taelo le ka ho loka, o fela a tla phela, a ke ke a shwa.

Diketso 13:38

Banna ba heso, tsebang ka hoo hobane tshwarelo ya dibe le e bo-leletswe ka yena.

Diketso 5:31

Modimo o mo phahamiseditse letsohong le letona la oona, hore e be yena Morena le Mmoloki ya neang Iseraele pako le tshwarelo ya dibe.

Tshenolo 3:20

Bona, ke eme monyako, mme ke a kokota; ekare ha e mong a utlwa lentswe la ka, mme a bula monyako, ke tla kena ha hae, mme ke tla lalla le yena, le yena le nna.

Mattheu 6:14

Hobane ekare ha le tshwarela batho ditlolo tsa bona, Ntata lona ya mahodimong o tla le tshwarela le lona.

Tite 2:11, 12

Hobane mohau wa Modimo, o ka bolokang batho bohle, o bona-hetse: o ntse o re ruta ho tela ho se tshabe Modimo le ditakatso tsa lefatshe, re tle re phele nakong ya jwale ka kelello, ka ho loka, le ka borapedi.

Bakolosse 3:2

Hopolang dinto tse hodimo, e seng tse lefatsheng.

Jakobo 4:4

Banna le basadi ba bafebi, hleka ha le tsebe hoba ho rata lefatshe ke ho lwantsha Modimo na? Efela ya phehellang ho iketsa motswalle wa lefatshe o ipea sera ho Modimo.

Esaia 1:16

Itlhatsweng, le itlhwekise; tlo-sang bolotsana ba diketso tsa lona pela mahlo a ka, lesang ho e-tsa hampe.

I Johanne 2:15, 16

Se rateng lefatshe, leha e. le tse lefatsheng; ekare ha motho a rata lefatshe, lerato la Ntate ha le yo ho yena. Hobane tsohle tse lefatsheng, takatso ya nama, le takatso ya mahlo, le boikgantsho jwa bophelo, ha di tswe ho Ntate, empa di tswa lefatsheng.

Baefese 5:11

Mme le se ke la ba le kabelo mesebetsing e nyopang ya lefifi, le mpe le e nyatse.

Esekiele 36:26

Ke tla le nea pelo e ntjha, ke kenye moya o motjha ka hare ho lona; ke tla tlosa pelo ya lejwe nameng ya lona; ke le nee pelo ya nama.

II Bakorinthe 5:17

Ka baka leo, motho ha a le ho Krete, ke mmopuwa e motjha; tsa kgale di fetile; bonang, tsohle di ntjhafetse.

Johanne 3:3

Jesu a araba, a re ho yena: Ka nnete ke re ho wena: Motho ha a sa tswalwe la bobedi, o sitwa ho bona mmuso wa Modimo.

I Johanne 2:29

Ha le tseba hobane o lokile, le ke le tsebe hoba e mong le e mong ya etsang ho lokileng, o tswetswe ke yena.

I Petrose 1:23

Le tswe le boetse le tswetswe, e seng ka peo e bolang, e leng ka e sa boleng, ka lentsewe la Modimo le phelang, le hlohang ka ho sa feleng.

I Johanne 5:18

Re a tseba hoba e mong le e mong ya tswetsweng ke Modimo ha a etse sebe; empa ya tswetsweng ke Modimo o a ipoloka, mme e mobe ha a mo ame.

Baefese 2:1, 6

O le tsositse jwalo le lona le neng le shwele melatong ya lona le dibeng tsa lona. . . mme o re tsositse hammoho, wa ba wa re dudisa hammoho mahodimong, ho Jesu Krete.

Bakolosse 3:1

Jwale, ha le tsohhile le Krete, batlang dintho tse hodimo, moo Krete a dutseng letsohong le letona la Modimo.

I Petrose 2:24

Yena ya jereng dibe tsa rona mmeleng wa hae sefapanong, hore re shwe ka nqa ya dibe, re tle re phelele ho loka; eo le fodisitsweng ka matetetso a hae.

Bagalata 5:24

Mme bao e leng ba Krete, ba thakgisitse nama, le dithato, le ditakatso tsa yona.

Baroma 6:2, 11

Ana rona re shweleng ka nqa ya sebe, re ka nna ra phelela jwang ho sona? . . . Ka mokgwa o jwalo, le lona, le ke le bale hore le shwele ka nqeng ya sebe, le hore le phelela Modimo ka Jesu Krete.

Bakolosse 2:13

Eitse ha le ne le sa ntse le itjhweletse dibeng tsa lona le ho se bolleng ha nama ya lona, o le phedisitse hammoho le yena, ka ho le tshwarela ditlolo tsohle.

BOPHELO BO SAFELENG**Johanne 3:14, 15**

Mme jwaleka ha Moshe, a ne a fanyeha noha feelleng, Mora motho e ka kgona a fanyehwe jwalo; hore e mong le e mong ya dumelang ho yena a se ke a time-la, a mpe a be le bophelo bo sa feleng.

Johanne 17:3

Mme bophelo bo sa feleng ke hore ba o tsebe, wena Modimo o nnotshi wa nnete, le Jesu Krete eo o mo romileng.

Baroma 6:23

Hobane moputso wa sebe ke lefu; empa neo ya mohau ya Modimo ke bophelo bo sa feleng, ka Jesu Krete, Morena wa rona.

Johanne 3:36

Ya dumelang ho Mora, o na le bophelo bo sa feleng; mme ya sa dumelang ho Mora, a ke ke a bona bophelo, empa bohale ba Modimo bo sala hodima hae.

Bagalata 6:8

Ya jallang nama ya hae, o tla kotula nameng ho bola; empa ya jallang Moya, o tla kotula Moyeng bophelo bo sa feleng.

Johanne 5:24

Ka nnetenete ke re ho lona: Ya utlwanang lentswe la ka, mme a dumela ya nthomileng, o na le bophelo bo sa feleng; ha a ka ke a tla kahlolong, empa o tlohile lefung ho kena bophelong.

Bagalata 4:6

Mme ereka ha le le bana, Modimo o rometse dipelong tsa lona Moya wa Mora wa oona, o hoang, o re: Abba! Ntate!

I Johanne 4:13

Mokgwa oo re tsebang ka oona hobane re dutse ho oona, le oona ho rona, ke hobane o re ngwatsetse Moya wa oona.

I Johanne 3:24

Mme ya bolokang ditaello tsa oona o dutse ho oona, le oona o dutse ho-yena, mme hoo re tsebang ka hona hobane o dutse ho rona, ke ka Moya oo o re nei-leng oona.

Johanne 14:21

Ya nang le melao ya ka, mme a e boloka, ke yena ya nthatang; mme ya nthatang o tla ratwa ke Ntate; le nna ke tla mo rata, mme ke tla ipontsha yena.

Baroma 8:16

Le oona Moya o emelana le moya wa rona, hore re bana ba Modimo.

I Johanne 3:18, 19

Bana ba ka, re se ke ra rata ka dipolelo le ka leleme, e mpe e be ka ketso le ka nnete. Ke ka hoo re tsebang hobane re ba nnete, mme re ka tshepisang dipelo tsa rona pela oona.

KRESTE EA PHELANG HAR'A RONA O RE NEHA THABO

Baroma 14:17

Hobane mmuso wa Modimo hase ho ja, hase ho nwa, empa ke ho loka, le kgotso, le thabo, ka Moya o Halalelang.

Bagalata 2:20

Ke thakgisitswe le Kreste, mme ha e hlole e le nna ya phelang, empa e le Kreste ya phelang ka ho nna; mme jwale, ha ke sa ntse ke phela nameng, ke iphelela tumelong ho Mora Modimo, ya nthatleng, a ba a itella nna.

Esaia 12:3

Le tla ikgella metsi ka thabo didibeng tsa poloko.

Johanne 17:13

Empa jwale, ke tla ho wena, mme ke bolela taba tsena ke sa le lefatsheng, hore ba be le thabo ya ka, mme e tlale ho bona.

Johanne 15:11

Ke le boleletse taba tseo, hore thabo ya ka e dule ho lona, mme thabo ya lona e tlale.

Dipesaleme 16:11

O tla ntsebisa tsela ya bophelo. Kgora ya thabo e teng pela hao, le dinyakallo tse sa feleng tsohong la hao le letona.

Baefese 3:17

Kreste a tle a ahe dipelong tsa lona ka tumelo.

I Samuele 12:15

Empa ha le hana ho utlwa lentswe la Jehova, ha le ikgantshe-tsa molomo wa Jehova, letsoho la Jehova le tla fetoha sera ho lona, jwaleka ha le kile la iphe-tola sera ho bo-ntata lona.

Baroma 6:16

Ana ha le tsebe hoba, ha le ipea bahlanka ba e mong ho mo utlwa, le bahlanka ba eo le mo utlwang, leha e le ba sebe se isang lefung, leha e le ba kutlo e isang ho lokeng?

II Bathessalonika 1:7-9

Mme lona ba tshwenngwang, le etsetswe phomolo le rona mohla Morena Jesu a bonahalang a e-

tswa lehodimong, le mangeloi a matla a hae, ka mollo o tukang, ho iphetetsa ho ba sa tsebeng Modimo, le ho ba sa utlweng Evangelidi ya Jesu Krete, Morena wa rona. Bao ba tla otlwa ka tshe-nyeho e sa feleng, ba tloswe pela Morena, le pela kganya ya matla a hae.

Deuteronomoma 11:26-28a

Bonang, kajeno ke bea hlohonolofatso le thohako pela lona; hlohonolofatso ha le ka utlwa ditaelo tsa Jehova, Modimo wa lona, tseo ke le laelang tsona kajeno; thohako ha le sa utlwe ditaelo tsa Jehova, Modimo wa lona. . .

HO TSOANETSE HO LUMELA KRESTE

Bafilippi 2:11

Mme maleme ohle a bolele hore Jesu Kreste ke Morena, e be tlotliso ya Modimo Ntate.

Mattheu 10:32, 33

E mong le e mong ya tla mpo-
lela pela batho, le nna ke tla
mmolela pela Ntate ya mahodi-
mong; empa e mong le e mong ya
tla ntatola pela batho, le nna ke
tla mo latola pela Ntate ya maho-
dimong.

Baroma 10:9, 10

Ekare ha o bolela ka molomo
wa hao hobane Jesu ke Morena,
mme o dumela pelong ya hao ho-
bane Modimo o mo tsositse ba-

fung, o tla bolokeha. Hobane
motho o dumela ka pelo, hore a
bewe ya lokileng, mme o bolela
ka molomo, hore a bolokehe.

Luka 9:26

Hobane e mong le e mong ya
hlajwang ke dihlong ka nna le ka
ditaba tsa ka, Mora motho le ye-
na o tla mo hlabelwa ke dihlong,
mohla a tlang ka kganya ya hae,
le ya Ntatae, le ya mangeloi a
halalelang.

I Johanne 2:23

E mong le e mong ya latolang
Mora ha a bile ha a na le yena
Ntate; empa ya bolelang Mora,
o bile o na le yena le Ntate.

II Bathessalonika 2:9

Ke lekanya eo ho tla ha hae ho leng ka tshebetso ya Satane, ka matla ohle, le ka dipontsho, le ka mehlolo ya bohata.

Diketso 26:18

O tle o tutubolle mahlo a bona, hore ba tlohe lefifing ho kena le-seding, ba tlohe le matleng a Satane ho sokolohela ho Modimo, mme ba bone tshwarelo ya dibe tsa bona le lefa hara bahalaledi ka ho dumela ho nna.

I Petrose 5:8

Le tsohe masene, le fadimehe; hobane Diabolose, e leng sera sa lona, o ntse a dika-dika jwaleka

tau e purumang, e batlang eo e ka mo jang.

Mattheu 4:1, 10, 11

Yaba Jesu o iswa ke Moya feeleng, ho lekwa ke Diabolose. . . Jwale, Jesu a re ho yena: Tloha, Satane, hobane ho ngodilwe, ho thwe: Kgumamela Morena, Modimo wa hao, mme o sebeletse yena feela. Jwale, Diabolose a mo tlohela; mme bonang, mangeloi a atamela Jesu, a mo sebeletsa.

Baefese 6:11

Aparang dihloho tsohle tsa Modimo, le tle le tsebe ho hlola dihloho tsohle tsa Diabolose.

Jakobo 4:7, 8a

Ka baka leo, ipeeng ka tlase ho Modimo, le hanele Diabolose, mme o tla le balehela, Atamelang Modimo, mme o tla le atamela.

Baheberu 2:14

Mme ka hobane bana ba na le kabelo nameng le mading, le yena o ile a ba le kabelo teng jwaleka bona, hore a fedise ka lefa la hae ya nang le mmuso wa lefu, ke ho re, Diabolose.

I Johanne 3:8

Ya etsang sebe ke wa Diabolose; hobane Diabolose o etsa sebe e sa le ho qaleng. Lebaka leo

Mora Modimo a hlahileng ka lona, ke hore a fedise mesebetsi ya Diabolose.

Baroma 8:35, 37

Ke mang ya tla re arohanya le lerato la Krete na? Na a ke botubo, kapa tsietsi, kapa hloriso, kapa tlala, kapa bofuma, kapa timelo, kapa lerumo. . . Tjhe! Empa nthong tseo tsohle, re hlola ka ho fetisisa ke ya re ratileng.

II Bathessalonika 2:8

Mme ke moo ho tla hlaha molotsana, eo Morena a tlang ho mo fedisa ka moya wa molomo wa hae, mme o tla mo timetsa ka ponahalo ya ho hlaha ha hae.

I Johanne 4:20

E mong ha a re: Ke rata Modimo, mme a hloya ngwanabo, o leshano; hobane ya sa rateng ngwanabo eo a mmonang, a ka tseba jwang ho rata Modimo oo a sa o boneng?

Johanne 13:35

Seo bohle ba tla tseba hobane le barutuwa ba ka ka sona, ke ha le ratana.

I Johanne 3:14

Moo re tsebang hobane re falletse lefung ho kena bophelong, ke ha re rata banababo rona. Ya sa rateng ngwanabo o sa dutse lefung.

Bagalata 5:22

Empa tholwana ya Moya ke lerato, le thabo, le kgotso, le sebetse, le kgauho, le molemo, le botshepehi, le bonolo, le boitshwaro.

I Bakorinthe 13:1

Leha nka bua dipuo tsa batho le tsa mangeloi, ha ke se na lerato, ke jwaleka koporo e llang, leha e le simbala e modumo o moholo.

Johanne 21:16

A re ho yena la bobedi: Simone, mora Jona, a o a nthata na? A re ho yena: E, Morena, o tseba hoba ke a o rata. Jesu a re ho yena: Disa dinku tsa ka.

Baroma 4:25

E leng yena ya teletsweng lefu ka baka la dibe tsa rona, mme o tsositswe ho re bea ba lokileng.

Johanne 20:26-28

Eitse ha ditshiu tse robileng meno e le mmedi di fetile, barutuwa ba hae ba ne ba boetse ba le tlung, le Thomase a ena le bona. Yaba Jesu o a hlaha, menyako e ntse e kwetswe, a ema hara bona, a re: Kgotso e be le lona! A ntoo re ho Thomase: Tlisa monwana wa hao mona, mme o tadima dia-tla tsa ka; ntsha letsoho la hao, o le kenye lehlakoreng la ka, mme o se ke wa ba ya sa dumeleng,

o mpe o be ya dumelang. Thomase a araba, a re ho yena: Morena wa ka le Modimo wa ka!

Diketso 10:39-41

Rona, re dipaki tsa ditaba tsohle tseo a di entseng naheng ya Bajode le Jerusalema. Ba mo fankehile sefateng, ba mmolaya. Empa Jesu eo, Modimo o mo tsoitse bafung ka letsatsi la boraro, mme o mo hlahisitse pontsheng, e seng ho setjhaba kaofela, e le ho dipaki tseo Modimo o di kgethileng pele, e leng rona bao re jeleng, re nweleng le yena, hobane a tsohe bafung.

Mattheu 16:21

Ho tloha mohleng oo, Jesu a qala ho hlaloseisa barutuwa ba hae hore e ka kgona a ye Jerusalema, a utlwiswe bohloko bo bohlo ke baholo le baprista ba baholo le bangodi, mme a bolawe, a ntoo tsoha ka letsatsi la boraro.

Johanne 5:25, 28, 29

Ka nnetenete ke re ho lona: Nako e a tla, le jwale e se e tlele, eo bafu ba tla utlwa lentse la Mora Modimo, mme ba le utlwang ba tla phela. . . Se makaleng ke hoo; hobane nako e a tla, eo bohle ba mabitleng ba tla utlwa lentse la hae; mme ba tla

tswa ho ona, ba entseng hantle ba tsohele bophelo, mme ba entseng hampe ba tsohele tsuo.

Baroma 6:3-5

Ana ha le tsebe hobane rona bohle ba kolobeleditsweng ho Jesu Krete, re kolobeleditswe lefung la hae na? Ka baka leo, re ile ra patwa le yena ka ho kolobeletswa lefung, hore, jwaleka ha Krete a tsositswe bafung ke kganya Ntatae, ka mokgwa o jwalo le rona re tsamaye ka bophelo bo botjha. Hobane ekare ha re entswe setlama se le seng le yena ka ho tshwana le yena lefung la hae, re tla ba jwalo le tsohong ya hae.

BOHALALELI HO MORENA**I Petrose 1:15**

Empa jwaleka ha ya le bitsitseng a halalela, le lona le halalele metsamaong ya lona.

Luka 1:74, 75

Ya hore, ha re lwetswe matsohong a bao e leng dira ho rona, re mo sebeletse, re sa tshabe letho, kgalalelong le ho lokeng, pontsheng ho yena, ka matsatsi ohle a ho phela ha rona.

II Bakorinthe 7:1

Jwale, baratuwa, ha re ena le dipallo tseo, a re ke re itlhatsweng ditshila tsohle tsa nama tsa moya, re ntse re phetha kgala-

lelo ya rona ka ho tshaba Modimo.

II Timothea 2:21

Jwale, ekare ha motho a ithwekisa ka ho itima ntho tseo, o tla fetoha pitsa e kgethetsweng hlomphe, e molemo ho mong a yona, e lokiseditsweng mesebetsi yohle e metle.

I Petrose 1:2

Ba kgethilweng ka ho tsejwa pele ke Modimo Ntate, ba halaleditsweng ke Moya, hore ba utlwe Jesu Krete, mme ba fokwe ka madi a hae; ke re: Le ke le atisetswe mohau le kgotso.

Esaiia 35:8

Mmila o tla ba teng le tsela ya kgalalelo; ha ho motho ya di-tshila ya tlang ho feta teng, e tla ba ya ba lokileng feela; ya tsamayang tseleng eo leha e le sethoto a ke ke a lahleha.

Baheberu 13:12

Ka baka leo, Jesu le yena, a tle a halaletse setjhaba ka madi a hae, o kile a shwela ka ntle ho monyako wa motse.

I Johanne 1:9

Ha re ipolela dibe tsa rona, Modimo o a tshepeha, o lokile, hore o re tshwarele dibe mme o re hlatswe bokgopo bohle.

Mattheu 3:11

Ha e le nna, ke le kolobelletsa pako ka metsi feela; empa ya tlang ka morao ho nna, o mpheta ka matla, mme ha ke a lokela ho mo nkela dieta; ke yena ya tla le kolobetsa ka Moya o Halalelang le ka mollo.

Baefese 4:24

Le ho apara motho e motjha, ya bopilweng ka setshwantsho sa Modimo, ho lokeng le kgalalelong ya nnete.

Baefese 1:4

Kamoo o re kgethetseng ho yena, ha o ne o eso ho thee lefa-tshe, hore re tle re halalele, mme re hloke sekodi pela oona.

42 **BANNA BA TLETSENG MOEA OA MOLIMO**

Baroma 8:9

Empa lona, ha le nameng, le mpa le le moyeng, ha Moya wa Modimo o fela o ahile ka ho lona. Ekare ha motho a se na Moya wa Krete, hase wa hae.

Luka 11:13

Mme ha esita lona ba lonya, le tseba ho nea bana ba lona dintho tse molemo, Ntata lona ya lehodimong o tla fetisisa hakang ka ho nea Moya o Halalelang ho ba o kopang ho yena!

Diketso 13:52

Ha e le barutuwa, ba ne ba tletse thabo le Moya o Halalelang.

Esekiele 36:27

Ke tla bea moya wa ka hare ho lona, mme ke tla le tsamaisa dikomelong tsa ka, ke etse hore le boloke ditaello tsa ka, hore le di phethe.

Diketso 1:8a

Empa le tla fuwa matla mohla Moya o Halalelang o tlang ho lona. . .

Diketso 4:31

Eitse hobane ba rapele, nqalo eo ba phuthehetseng ho yona ya sisinyeha, mme bohle ba tlala Moya o Halalelang, mme ba bo-lela lentswe la Modimo ka matla.

Dipesaleme 34:18

Jehova o haufi le ba pelo tse robehileng, o thusa ba meya e teditsweng.

Esaiia 66:2

Tseo tsohle di entswe ke le-tsoho la ka; tsohle tseo di bile teng ka nna: ho bolela Jehova. Empa eo ke tla mo tadima ke ya hlomohileng, ya robehileng pelo, le ya thothometswang ke lentswe la ka.

Tshenolo 21:4

Modimo o tla hlakola meokgo yohle mahlong a bona; lefu ha le sa tla hlola le eba teng; mme ha

ho sa tla ba maswabi, leha e le ho bokolla, kapa bohloko; hobane tsa pele di fetile.

I Petrose 4:12, 13

Baratuwa, ha ho ena le ho kang mollo hara lona hore le lekwe ke oona, se makaleng jwaleka hola le hlhahetswe ke ntho e ka tso-twang; empa ereka ha le nkile kabelo mahlomoleng a Kreste, thabang hore, mohla kganya ya hae e bonahalang, le tle le thabe ke nyakallo e fetisisang.

Dipesaleme 37:3

O be le tshepo ho Jehova, o etse ho hotle; o ahe lefatsheng, o ikgorisetse nneteng.

Baheberu 2:18

Hobane ereka ha a utlwile bohloko mohla a lekwang, ke ka hoo a tsebang ho thusa ba lekwang.

Baroma 8:28

Mme re tseba hore dintho tsohle di sebedisana hammoho molemole wa ba ratang Modimo, e leng ba bitsitsweng ka morero wa oona.

Esaia 43:2

Ha o tshela hara metsi, ke tla ba le wena; ha o tshela dinoka, di ke ke tsa o nka: leha o feta hara mollo, o ke ke wa tjha, le malakabe a ke ke a o tlabola.

Dipesaleme 34:19

Mahlomola a ya lokileng a mangata; empa Jehova o montsha ho ona kaofela.

I Bakorinthe 10:13

Ha le eso ho 'ka le hlhelwa ke moleko o sa lekaneng motho; empa Modimo o a tshepeha, o ke ke wa dumela hore le hlhelwe ke moleko o ka le sitang; empa moleko ha o le teng, o tla le etsetsa le sebaka sa ho tswa ho oona, le tle le tsebe ho o jara.

Baroma 16:20

Modimo wa kgotso ke oona o tla phakisa o robokele Satane ka tlasa maoto a lona.

LITSEPISO HO BA HLOLANG

45

Tshenolo 21:7

Ya hlolang o tla ja lefa la ntho tsohle, mme ke tla ba Modimo wa hae, yena e be mora wa ka.

Tshenolo 3:21

Ya hloang, ke tla mo fa ho dula le nna teroneng ya ka, jwaleka ha le nna ke hlotse, mme ke dutse le Ntate teroneng ya hae.

Tshenolo 3:12

Ya hlolang, ke tla mo etsa tshiya tempeleng ya Modimo wa ka, mme ha a sa tla hlola a etswa teng; mme ke tla ngola hodima hae lebitso la Modimo wa ka, le lebitso la motse wa Modimo

wa ka, e leng Jerusalema e motjha, ya theohang lehodimong ho Modimo wa ka, le lebitso la ka le letjha.

Tshenolo 3:5

Ya hlolang, yena o tla apeswa diaparo tse tshweu, mme nke ke ka hlakola lebitso la hae bukeng ya bophelo, empa ke tla bolela lebitso la hae pela Ntate le pela mangeloi a hae.

Tshenolo 2:7

Ya nang le ditsebe a utlwe seo Moya o se bolellang dikereke: Ya hlolang, ke tla mo fa ho ja sefate sa ho phela, se ka hara Paradeise ya Modimo.

MOLIMO O BUA LE RONA KA TABA EA HO HLALANA

Mattheu 5:32

Empa nna, ke re ho lona: M^otho, leha e ka ba mang le mang, ya hlalang mosadi wa hae, ha e se ka baka la bofebe, o mmea ho-re a fetoh^e mofebi; mme e mong le e mong ya nyalang mosadi ya h^ladilweng, o a feba.

Baroma 7:2, 3

Ho jwalo, mosadi ya pusong ya monna o bofeletswe ho monna wa hae ke molao, monna ha a sa phela; empa ha monna a eshwa, eba o holotswe molaong wa monna. Ha ho le jwalo, ha a ka nyalana le monna e mong, monna

wa hae ha a sa phela, o tla bitswa mofebi; empa ha monna wa hae a shwele, o holotswe molaong, mme jwale, ha a ka nyalana le monna e mong, a ke ke a bitswa mofebi.

I Bakorinthe 7:10, 11

Ha e le ba seng ba nyetse, ke a ba laela, e seng nna, empa e le Morena, ke re: Mosadi a se ke a hlala monna wa hae—leha mosadi a se a mo h^ladile, a itulele, a se ke a nyalwa; kapa a boelane le monna wa hae—le yena monna a se ke a hlala mosadi wa hae.

Jakobo 5:8

Le lona, lebellang ka sebetse, mme le tiise dipelo tsa lona; hobane ho tla ha Morena ho haufi.

Mattheu 24:30

Mohlang oo, pontsho ya Mora motho e tla hlaha lehodimong; ke moo ditjhaba tsohle tsa lefatshe di tla iteta difuba, mme di tla bona Mora motho a etla ka maru a lehodimo, ka matla a maholo le ka kganya e kholo.

Johanne 14:3

Mme etlare ha ke se ke ile, ke le lokiseditse bodulo, ke tla boela ke boye, ke le nkele ho nna, hore

moo nna ke leng teng, le lona le be teng.

Mareka 8:38

Hobane ya hlajwang ke dihlolong ka nna le ka ditaba tsa ka, pela moloko ona o mofebi, o moetsadibe, le yena Mora motho o tla mo hlabelwa ke dihlolong, mohla a tlang ka kganya ya Ntatae hammoho le mangeloi a halalelang.

Mattheu 24:27

Hobane jwaleka ha lehadima le hadima le etswa Botjhabela, mme le benyetsa Bophirimela, ho tla ha Mora motho ho tla ba jwalo.

I Johanne 3:2

Baratuwa, jwale re bana ba Modimo, mme seo re tla ba sona ha se eso ho bonahatswe; empa re a tseba hobane, mohla se bonahatswang, re tla tshwana le oona; hobane re tla o bona kamoo o leng kateng.

Luka 12:40

Jwale, le lona le itokise; hobane Mora motho o tla tla ka nako eo le sa e hopolang.

Mattheu 16:27

Hobane Mora motho o tla tla ka kganya ya Ntatae le mangeloi a hae; mme mohlang oo, o tla nea e mong le e mong ka tekanyo ya diketso tsa hae.

Luka 21:27

Ke moo ba tla bona Mora motho a etla ka leru, ka matla le ka kganya e kgolo.

Tshenolo 16:15

Bonang, ke tla jwaleka leshodu. Ho lehlohonolo ya lebelang, ya bolokang diaparo tsa hae, hore a tle a se ke a tsamaya a le feela, mme dihlong tsa hae di se ke tsa bonahala!

Diketso 1:11

Ba re: Banna ba Galilea, le ntse le emetseng, le lelaletse lehodimong? Jesu eo ya nketsweng lehodimong a le hara lona, o tla be a tle ka mokgwa oo le mmoneng a eya lehodimong ka oona.

LENTSOE LA MOLIMO

II Petrose 1:21

Hobane ha e sa le, boprofeta ha bo a ka ba tlišwa ke ho rata ha motho, empa ke ka tshusumetso ya Moya o Halalelang batho ba halalelang ba Modimo ba buileng.

II Timothea 3:16

Lengolo lohle le budutsweng ke Moya wa Modimo, le na le molemo wa ho ruta, wa ho kgodisa, wa ho laya, le wa ho hodisa ka kgolo ya ho loka.

Dipesaleme 119:89

Jehova, lentswe la hao le hlola mahodimong ka ho sa feleng.

Dipesaleme 119:105

Lentswe la hao ke lebone la maoto a ka, ke lesedi tseleng ya ka.

Dipesaleme 119:11

Ke boloke lentswe la hao ka pelong ya ka, hore ke se ke ka o sitelwa.

Mattheu 22:29

Empa Jesu a fetola, a re ho bona: Le lahlehile ke hobane ha le tsebe Mangolo le matla a Modimo.

Luka 21:33

Lehodimo le tla feta le lona lefatshe, empa dipolelo tsa ka di ke ke tsa ba tsa feta.

Quotations from the Bible in Sesotho © Bible Society of South Africa, used with permission of the publishers.

Published in numerous languages by World Missionary Press as God supplies funds in answer to prayer. Other booklets are also available. If you would like more copies for careful distribution, please write in English to:

World Missionary Press, Inc.
P.O. Box 120
New Paris, Indiana 46553-0120 USA

7-98

550
74 Sesotho HFA

Lesotho
